

Motion concernant l'autorisation de la pratique de radiodiagnostic au Centre médical Potaschberg

D'Chamber vun den Deputéierten

stellt fest, datt

– et an der Radiodiagnostik zënter Joren e Manktem u Capacitéiten am Land gëtt, zemools wat den IRM ugeet, mat deemtsprechend laange Waardezäiten, fir e Rendez-vous ze kréien;

– den IRM an aner radiodiagnostesch Servicer zu Lëtzebuerg weider just a Spideeler funktionéieren, dat well d'Gesondheitsministesch de Betrib vun ambulante medezinnesche Strukture blockéiert;

– d'Cour constitutionnelle tranchéiert huet, datt technesch Apparater am Kader vun der Radiologie och dierfen an Dokteschcabineten installéiert ginn;

– déi éischt radiodiagnostesch Praxis vum Land, am Centre médical Potaschberg, mat IRM, Scanner a Röntgenapparat, prett ass, fir hir Dieren den 1. Abrëll opzemaachen, an déi deemtsprechend Autorisatiounen vun der ITM an der Santé virleien;

– d'Gesondheitsministesch trotzdeem keng Autorisatioun fir dës an aner radiodiagnostesch Servicer baussent de Spideeler gëtt, dat mam Argument, datt, fir Tariffer a Remboursement ze reegelen, nach e Gesetz ausgeschafft misst ginn;

– grad den Oste vum Land benodelegt ass, wat radiodiagnostesch Servicer ugeet,

fuerdert d'Regierung op,

– fir de Betrib vun der Radiodiagnostik am Centre médical Potaschberg direkt zouzeloossen an déi nämmleche Tariffer anzeféieren, wéi se de Moment an de Spideeler am Land praktikéiert ginn, dat op d'mannst esou laang bis déi definitiv Tariffer mat der AMMD ofgeschwat a gesetzlech definéiert goufen.

(s.) Jeff Engelen.

M. Fernand Etgen, Président | Merci, Här Engelen.

11. 7884 – Projet de loi modifiant la loi modifiée du 23 décembre 2016 instituant un régime d'aides pour la promotion de la durabilité, de l'utilisation rationnelle de l'énergie et des énergies renouvelables dans le domaine du logement

An als nächste Punkt hu mer de Projet de loi 7884 iwwert d'Aféierung vu verschidde Bähëllefen am Logementsberäich. D'Riedezäit ass nom Basismodell festgeluecht. An d'Wuert huet elo d'Rapportrice vun dësem Projet de loi, déi honorabel Madamm Semiray Ahmedova.

Rapport de la Commission de l'Environnement, du Climat, de l'Énergie et de l'Aménagement du territoire

Mme Semiray Ahmedova (déi gréng), rapportrice | Merci, Här President. Léif Kollegeinnen a Kollegen, et ass haut eng Evidenz, méi wéi jeemools virdrun, datt mer mussen onofhängeg vun Energie ginn, déi fossill sinn, déi importéiert ginn. An déi Dependence muss mer einfach brieche.

Wa mir den nächste Generatiounen e liewenswäerte Planéit wëllen hannerloossen, geopolitesch net méi wëllen erpressbar sinn a manner vum Import ofhängeg sinn, da muss mer esou schnell wéi méiglech d'Energieeffizienz ausbauen an op erneierbar Energien ëmsteigen, an dat an alle Beräicher.

Et ass ee vun deene gréissten Defien, awer och eng Suerg, déi mer hautdesdaags hunn. En plus ass et kloer, datt d'Bierger an d'Biergerinne bei dëser kruzialer Transitiounen mussen ënnerstëtzt ginn. A genau dat maache mer haut mat dësem Projet de loi. PRIMe House ass nämlech déi finanziell Ënnerstëtzung, fir energieatesch Sanéierung, an déi gi stänneg ... Am Fong ginn déi energieatesch Sanéierung ëmmer erëm verstärkt an ëmmer méi breet opgefächert.

Op deem Wee kréien d'Bierger/innen elo méi Ënnerstëtzung, fir Renovatiounsprojeten unzegoen an esou laangfristeg kënne Suen ze spueren. Weider ginn administrativ Hürden, an dat wëll ech awer och ënnersträichen op dëser Plaz, ofgebaut. D'Zil ass et, méi einfach vun dësen Aidë kënnen ze profitéieren, zemools well ganz oft just een oder zwee Baudeeler vun der energieatescher Renovatioun concernéiert sinn.

Duerch dee Projet de loi komme mir also nach méi séier weider fir manner Ofhängegkeet vu fossillen Energien aus dem Ausland a contribuéieren, an dat seet een net oft genuch, zu enger Verbesserung vun der Wunnqualität.

Här President, ech stellen Iech dann haut och de Gesetzesprojet 7884 vir, deen d'Gesetz u sech vum 23. Dezember 2016 ofännert iwwer en Hëllefprogramm fir d'Förderung vun der Nohaltegkeet, d'rationell Notzung vun den Energien an erneierbar Energien am Beräich Logement.

PRIME House ass e Regimm, deen et scho méi laang gëtt, wéi ech scho virdu gesot hunn, an dee lafend konsequent verstärkt gëtt.

De leschten Update war fir den „Neistart Lëtzebuerg“, wou mer d'Subventiounen fir d'Energieberodung an déi energieatesch Sanéierung ëm ganzer 50 % eropgesat haten. Eis Gebaier méi effizient opzestellen, ass besonnesch wichteg, well 20 % vun eisen nationalen CO₂-Emissiounen sinn op d'Gebaier zrëckzeféieren. Fir Iech de Status quo ze ginn: 2020 goufen 1,6 Milliounen Tonnen CO₂ ausgestouss.

Mir wëllen och d'Emissiounen an dësem Beräich bis 2030 ëm 64 % reduzéieren, natierlech par rapport zu 2005. An hei ass virun allem wierklech e groussen Aspuepotenzial am Albau oder Bestand, wéi een et och wëllt nennen. An do muss mer wierklech ... Mir mussen a mir kënnen och méi séier handeln. Fir d'Energieeffizienz am Logementsberäich ze erhéien, gesäit och de PNEC e ganz ambitiëst Zil vir, nämlech ganzer 3 % am Joer, déi solle renovéiert ginn (veuillez lire: nämlech e Sanéierungstaux vu ganzer 3 % am Joer).

Ech probéieren Iech wierklech kuerz a kloer déi Haaptännerungen am Gesetz ze erklären.

D'Finanzhëllef ginn am Ganzen ëm fénnef Joer verlängert. Vlächcht zwee Stéchdatum, déi Der Iech musst verhalen: D'Aarbechte kënne bis 2029 gemaach ginn. Dat heescht, déi lescht Rechnung muss vun 2029 sinn, an dann hutt Der nach weider zwee Joer Zäit, fir déi lescht Demande eranzerechen.

Da kennt eng ganz interessant a ganz wichteg Measure. Fir déi, déi am Beräich ware bis elo, ass et wierklech eppes Neies. Et kann een ab elo nëmmen ee Baudeel isoléieren. Mee déi Neiheet ass net, datt de Baudeel isoléiert gëtt, mee datt een net méi muss onbedéngt eng ganz Energieberodung maachen. Well bis elo war et esou: Dat ganz Haus gouf analyséiert, och wann Der just eng Mesure ëmgesat hutt. An elo ass et esou: Dir maacht just eng Energieberodung pro Bauelement, wat Der kennt herno isoléieren a woufir Der och Subventiounen kritt.

Et gëtt och eng Verlängerung a Verstärkung vun de Subventiounen, fir vu fossillen Energien op erneierbar Energien ze goen; si gi verbessert, verstärkt an

an d'Luucht gesat. Also dat heescht, de Mazoutersatzprogramm gëtt weider verstärkt an Dir kritt ganzer 30 % Bonus; dat heescht, méi wéi dat, wat Der bis elo krut, fir eebe vu fossillen Energien op erneierbar Energien ze wiesselen, wat den Heizsystem ugeet.

En zousätzleche Bonus vu 50 % kritt Der och fir d'Entsuerung vun enger Mazoutsuue. Déi muss entsuergt a recyléiert ginn. An dat gouf et och nach net bis elo.

Nei ass och eng Loft-Wärmepompel, déi am Albau eligibel ass – bis elo war et just am Neibau –, an d'Subventiounen ginn och eropgesat. Nei ass och eng Hybrid-Wärmepompel, dat heescht eng Wärmepompel, wou zwou Sourcë gebraucht ginn. Hybrid-Installatiounen an dat Ganz, wéi gesot, gëtt verstärkt an elo finanzéiert.

E Bonus vu 50 % kritt Der och, wann Der eng fossill Chaudière duerch eng erneierbar Chaudière ersetzt. An d'Konsequenz ass u sech, datt Der musst och déi ganz Installatioun, wat d'Tuyauen ugeet, doheem ersetzen. An dat gëtt eben elo och subventionéiert.

Dir kritt och méi Subventiounen, wann Der Iech un e sougenannt Fernwärmenetz uschléisst oder vlächcht besser bekannt ënner Réseau urbain.

Bei der Holzchaudière ass et och esou: Et war ëmmer gutt, wann een e Partikelfilter hat, wéinst dem Feinstëbs, mee dee gouf bis elo net subventionéiert. An ab elo gëtt en och mat subventionéiert, fir eben eng besser Loftqualität ze garantéieren.

D'finanziell Ënnerstëtzung, wéi ech scho virdu gesot hunn, gëtt dem Niveau vun „Neistart Lëtzebuerg“ och erëm ugepasst; dat heescht, 50 % méi fir déi Energieberodung. Fir den Ausbau vun erneierbaren Energië weiderzedreien a virun allem fir d'Leit ze encouragéieren, a Richtung Eegennotzung ze goen, wat d'Fotovoltaikanlagen ugeet – dat heescht, wann ee Strom op sengem Daach produzéiert, soll een och encouragéiert ginn, fir dee selwer ze notzen –, gi fir dësen Zweck 50 % vun de Coût-effectifité vum den Anlage subventionéiert, wat u sech soll derzou féieren, datt ee soll méi onofhängeg ginn.

Da ginn och nach Modifikatiounen gemaach, esou datt d'Isolatiounsmaterialien no Ökokrittäre méi oder manner subventionéiert ginn. An esou muss ee soen: Ab 2024 wäerten nottament keng fossill Isolatiounen méi finanzéiert ginn, ausser si bestinn zu 50 % aus recyléiertem Material. Fossill Isolatioun: Styropor, Styrodur, Ökomaterialien: Hanf, Holzfaser et cetera.

Et ass wichteg, och op dëser Plaz ze soen, datt dat heite Gesetz och vun engem Règlement grand-ducal begleet gëtt, wou déi konkret Ëmsetzungsmesuren an d'Konditiounen drastinn. A béid gëllen ab dem 1. Januar 2022.

Wat d'Finanzhëllef beim Neibau ugin, ginn d'Subventiounen ëm ee Joer verlängert. Firwat just ee Joer? Well mer amgaange sinn, de LENOZ-Konzept, dat heescht d'Lëtzebuurger Nohaltegkeets-Zertifizéierung, ze reforméieren, an do d'Durabilitéitskrittären nei definéiert ginn.

Wat ass dat fir eng Zertifizéierung? Just e puer Wuert, fir datt d'Leit et och verstinn. Do gëtt d'Nohaltegkeet gekuckt am Bau an och um Bau. Dat heescht, d'Materialien, déi benotzt ginn, a wéi bauen ech déi Materialien a mengem Bau an. Kann ech se erëm demontéieren, fir eng Zirkularitéit ze garantéieren oder net?

An op deem Wee wëlle mer natierlech méi lokal Produktioun vun de Baumaterialien an d'Kreeslafwirtschaft ënnerstëtzen.

Ech komme kuerz zu den Avisen. A sengem Avis vum 1. Februar 2022 huet de Staatsrot u sech keng formell

Oppositionen zum Gesetzesprojekt. Par contre hu si e puer Oppositionen, wat de Règlement grand-ducal ugeet. Déi Reklamatiounen sinn, datt Saachen, déi bis elo am Règlement grand-ducal verankert waren, sollen u sech elo am Gesetz verankert ginn, an dat Ganz, fir konform ze si mat enger Jurisprudence vun der Cour constitutionnelle.

Am zweeten Avis, dem Avis complémentaire vum Staatsrot hu se just zwou Bemierkungen u sech, also zwou Remarken oder Contestatiounen souzeseen, an dat sinn Datumer. Engersäits fir den Albau, well elo ass et esou, datt e Gebai eréischt da ka sanéiert a subventionéiert ginn, wann et méi al ass wéi zéng Joer. An dat Zweet ass déi Period fir déi Eliminatioun vun der Mazouts-cuve.

Mir kruten och aner Avisen eran, ënner anerem vun der Handwierkerkummer, der Chambre de Commerce, der Chambre des Salariés, der Chambre des Fonctionnaires et Employés publics. An allgemeng begrësse si natierlech allegueren, datt déi Subventiounen fir eng energieetesche Sanéierung eropgesat ginn. Si begrëssen awer och en neit Element, datt ass nämlech déi Méiglechkeet, datt am Fong déi Subventiounen direkt un den Handwierker ausbezuel ginn, esou brauch de Client u sech dat net méi ze bezuelen an esou gëtt de Montant, deen de Client reell investéiert, och natierlech dee Moment erfogesch.

Fir weider Detailer verweisen ech natierlech op mäi schrëftleche Rapport.

Kuerz zu den Aarbechte vun der Kommissioun, an da wier ech fäerdeg. D'Gesetz gouf de 15. September d'lescht Joer vun der Ëmweltministesch an der Chamber deposéiert. Den 23. Mäerz hu mir an der zoustänneger Chamberskommissioun de Gesetzesprojekt, d'Amendementen an den Avis vum Staatsrot analyséiert, an de Rapport gouf de 25. Mäerz ugeholl.

Ech kommen zu menger Konklusioun. Ech si frou, datt mir dese Projet esou schnell an d'Pleniëre konnte bréngen.

Une voix | Ech och.

Mme Semiray Ahmedova (déi gréng), rapportrice | Gell?

(Hilarité)

Une voix | Dat ass eng gutt Saach.

Mme Semiray Ahmedova (déi gréng), rapportrice | Dat ass eng super Saach, well et handelt sech nämlech hei ëm e ganz, ganz extreem sënnavolle Projet, mat deem d'Gebaier mat erneierbaren Energien an d'Effizienz vun de Gebaier weider gestärkt ginn.

Mat dësen Ännerungen an deem Gesetzesprojekt vereinfache mer am Fong, wéi ech scho gesot hunn, d'Prozeduren. D'Bierger an d'Biergerinne kréien elo méi Ënnerstëtzung, fir energieetesche Renovatiounen ze ënnerhuelen. Domadder gi se natierlech och laangfristeg onofhängeg. Domadder spueren se natierlech laangfristeg Suen. A wéi ech scho virdru gesot hunn, net ze vergiessen, si verbesseren am Wunnraum hir Wunnqualitéit.

Merci fir d'Nolauschten!

Plusieurs voix | Très bien!

M. Fernand Etgen, Président | Merci der Madamm Rapportrice Semiray Ahmedova.

An da wier et als éischten ageschriwwene Riedner um honorabelen Här Paul Galles.

Discussion générale

M. Paul Galles (CSV) | Jo, merci villmools, Här Präsident. Bei esou engem Turboprojet kann een der Madamm Rapportrice natierlech och gären déi Minutt

oder déi zwou méi ginn, fir dat dann ze presentéieren. Si huet vill Energie opbruecht, fir eis dat haut den Nomëtteg hei ze erzielen.

(Interruption)

Merci villmools fir hire Rapport, souwuel dee mëndleche wéi och dee schrëftlechen.

Et ass ee Projet, deen eis Ënnerstëtzung fënnt, an d'Madamm Ahmedova huet och déi Punkte schonn ervirgebrach, déi wichteg sinn an deem Projet, déi geännert ginn; zum Beispill eeben déi Tatsaach, dass een eng Mesure kann erausgräifen, ouni mussen eng global Energieberodung ze maachen, déi tatsächlech fir eng ganz Rei Leit bis elo en Hindernis war, fir dran ze investéieren, sech dran ze lancéieren, well et awer en Opwand bedeit, souwuel zäitlech, vläicht och vun den Nerven a vum Stress hier, an natierlech dann och déi finanziell Fro, déi hannendrustoung.

Dat ass zum Beispill eng vun deene Saachen, déi mer op alle Fall begrëssen. An d'Madamm Ahmedova huet och nach anerer genannt, déi derbäikomm sinn an déi dozou féieren, dass dee ganze Paquet vum PRIME House natierlech nach méi attraktiv gëtt.

Ech wëll awer op zwou Saachen hiweisen, déi eis och wichteg erschéngen.

Déi éischt Saach ass déi, dass elo am Accord vun der Tripartite jo och en Top-up social fir d'PRIME House virgesinn ass. Deen ass jo schonn an engem anere Gesetzesprojekt souwisou um Leescht. Dat weess d'Madamm Ahmedova och. Dat ass den 7938. Do geet et ëm deen Top-up social, dee jo scho virgesinn ass. Elo gëtt en nach eng Kéier verännert duerch den Accord vun der Tripartite. Wann ech dat richteg verstinn, geet ee vum Décile 4 an den Décile 5 eran, wat d'Eligibilitéit ugeet, an et gëtt och elo op 100 % eropgesat, méiglecherweis, amplaz vu 40 %.

Dat ass natierlech absolutt begrëssenswäert. Et muss ee just wëssen, dass hoffentlech natierlech doduerch d'Demande an d'Luucht geet an nach méi Leit sech elo och déi dote PRIME-House-Méiglechkeete wäerten uneegenen a wäerten nofroen.

An déi Fro, déi mir eis gestallt hunn, a mir hu se och an der Kommissioun scho gestallt, ass déi: Ass d'Agentur, ass d'Agence hannendrun – also d'Klimaagence oder MyEnergy virdrun – prett fir dat doten? Well mir sinn awer trotzdem am Virfeld vun deem Gesetzesprojekt ëfters domat konfrontéiert ginn, dass eng ganz Rei Leit laang gewaart hunn, dass se drukommen, dass se iwwerhaupt e Retour kruten, dass iwwerhaupt eng Kéier e Rendez-vous ausgemaach ginn ass an dass d'Bürokratie awer trotzdem nach grouss ass.

Ech weess, dass an deem Gesetzesprojekt virgesinn ass, dass eng Simplification administrative gemaach gëtt. Awer mir mussen eis bewosst sinn, dass, wann d'Demande an d'Luucht geet, da mussen mer d'Agence wierklech dorop virbereeden. An ech wëll och dem Här Minister déi Fro da weiderginn, wéi dat da virgesinn ass, well mer mengen ... An ech hunn et selwer erlieft, well ech elo eng Kéier nogefrot hu fir eng Energieberodung an ech gesot krut: „Mäi léiwe Paul, du muss elo ganz laang waarden, well do sinn der am Moment net vill do, déi elo Zäit hunn derfir.“ Dat ass déi eng Saach, déi ech wëll ze bedenke ginn.

Déi zweet Saach, déi mer wëllen ze bedenke ginn: Et geet jo ëm Neibauten, et geet awer och ëm Bestandsbauten. An deem Projet de loi ass beim Parc immobilier existant ganz vill Promotioun virgesinn: renforcer du conseil en énergie, renforcer des matériaux d'isolation écologiques an esou weider. Et gëtt awer nach en anere Gesetzesprojekt, deen och prett ass oder deen um Instanzewee ass, dat ass de 7763, wou et eebe grad bei de Bestandscopropriétéiten drëms geet, dee Fonds

de travaux do anzeféieren, fir eeben där erneierbarer Energien ëmzebauen.

(Brouhaha)

Wa mir dat richteg verstinn, a mir wëllen dat ze bedenke ginn, geet et do ëm eng Obligatioun fir esou e Fonds de travaux. Eng Obligatioun, dat heescht, mir wëllen ze bedenke ginn, dass ee sech do awer muss mat der Fro ausenanersetze vum Droit de propriété, wann een esou eng Obligatioun aféiert.

An dann natierlech och déi Fro, ob all Mënsch, deen dann zu där Copropriétéit gehéiert, ob dee sech dat dann och wierklech ka leeschten. An do ass natierlech ..., ech wëll dee Ball och nach eng Kéier zrëckspille vun deem Top-up social, ob dat net och e Modell wier, fir dee Moment, wou ee feststellt, dass an deene Bestandsgebaier Leit eebe sech dat do net leeschte kënnen, fir do nach Chargen elo obligatoresch anzubezuelen, fir do ëmzestellen, ob een net och do muss driwwer nodenken, ob déi Leit fir esou en Top-up social och eligibel wieren.

Voilà, dat sinn déi zwou Bemierkungen, déi mir mat op de Wee wollte ginn. An ech ginn den Accord am Numm vun der CSV.

Une voix | Très bien!

M. Fernand Etgen, Président | Merci, Här Galles. An ech ginn d'Wuert weider un den Här Max Hahn.

M. Max Hahn (DP) | Här President, duerch de fierchterleche Krich an der Ukrain si mer eis alt nees bewosst ginn, wéi ofhängeg mer vun Energieimporten sinn, vum Gas, vum Ueleg, vun de fossillen Energieträger, an dat besonnesch aus Länner wéi Russland.

Mir sinn eis eens, dass mer an Europa vill méi onofhängeg an där Hisiicht musse ginn. Et ass net ze toleréieren, dass e kriminelle Regime, deen d'Energie als geopolitescht Drockmittel asetzt, eis esou erpresse kann an eis forcéiert, seng onmënschlech Aggressiounen op d'Ukrain ze finanzéieren.

Mir gesinn och aktuell, dass et virun allem d'Leit sinn, déi wuertwäertlech de Präis vun eiser Ofhängegkeet bezuelen. D'aktuell Situatioun soll eis also eng zousätzlech Motivatioun sinn, déi aktuell Mesuren ëmzesetzen, déi och am Kampf géint de Klimawandel onëmgänglech sinn. Well och d'Erausforderungen, virun déi eis de Klimawandel stellt, sinn net méi kleng ginn. D'Klimakris huet näischt un hirer Urgence verluer, och wann de Krich an der Ukrain an de leschte Wochen eis Opmierksamkeet dominéiert huet.

Dat ass engersäits natierlech den Ausbau vun den erneierbaren Energien, an anerersäits ass déi bescht Energie natierlech déi, déi net gebraucht gëtt. Doweinst ass och d'Energieeffizienz eng vun eisen absolute Prioritéiten. Dese Gesetzesprojekt ass e weider wichtegt Puzzlestéck, fir déi fossill Energien am Wunnberäich ze reduzéieren.

De Logement ass nom Transport den zweetgréissten Secteur hei am Land, wat d'Emissiounen betrëfft. A puncto Neibau sti mer ganz gutt do, mat engem vun den héchsten Energiestandarden an Europa. D'Erausforderung läit awer éischter bei der Albusanierung.

Als DP begrësse mer doweinst natierlech, dass d'Subventiounen an deem Beräich weidergefuert, ausgebaut a vereinfacht ginn. Virun allem d'Méiglechkeet, vereenzelt Mesuren am Beräich vun der thermescher Hüll ouni Energieberodung maachen ze kënnen, ass wuel sënnavoll. Mir kënnen eis nämlech ganz gutt virstellen, dass d'Obligatioun, eng komplett Energieberodung mussen ze maachen, verschidde Leit ofgeschreckt huet, déi eebe just eenzel Mesurë wollte maachen.

Als DP wölle mer ouni Zweifel d'Leit encouragéieren, hiert Haus maximal energieetesch ze sanéieren. Nëmmen esou kréie mer eise klimatesche Foussofdruck esou niddreg, wéi et geet. Gläichzäiteg ass et eng Investitioun, déi sech op d'Dauer bezuelt mécht, wann een net méi de Präisschwankungen ausgesat ass.

Wien haut säin eegene Stroum produzéiert an domadder eng Wärmepompe bedreift, steet kloer besser do wéi deejéinegen, deen nach eng Mazoutsheizung huet an deem seng Heizkäschtchen doduerch an de leschte Méint explodéiert sinn.

Et ass also an deene Leit hirem eegenen Interêt, an d'energieetesch Sanéierung ze investéieren. Et ass kloer, d'Regierung muss an der aktueller Situatioun de Leit mat engem niddregen Akkommes kuerzfristeg ënner d'Ärm gräifen, fir d'Präisdeierecht ofzefiedere. Mee et ka just eng kuerzfristeg Léisung sinn. Mëttel- a laangfristeg ass déi bescht Pist déi, wéi gesot, vu Gas a Mazout onofhängeg ze ginn. Allerdéngs muss een och soen, dass eng komplett Sanéierung vun engem alen Haus e grouse Chantier ass, deen ee sech trotz generéis Subside muss kënne leeschten.

Wat op alle Fall wichteg ass, ass och hei, déi sozial Gerechtegkeet a Selektivitéit ze garantéieren. Grad déi Stéit, déi am meeschten un den aktuellen Energiepräisser ze knaen hunn, hunn net onbedéngt de finanzielle Spillraum, hir Wunneng ze sanéieren. An dës Stéit dierfen dofir net vergiess ginn. Grad déi akkommensschwaach Stéit sinn tendenziell méi dacks Locataire an domadder vum gudden Wille vum Proprietär ofhängeg, ob e seng Wunneng sanéiere wëllt oder eeben net.

Fir deem Rechnung ze droen, huet dës Regierung an der Vergaangenheet scho verschidde Mesuren decidéiert, wéi zum Beispill d'Erofsatz vum der TVA op 3 % fir Renovatiounen vu Wunnengen, déi zéng Joer hunn, oder d'Aféierung vun engem Taux d'amortissement op den Investitiounen an d'energieetesch Sanéierungen.

Ech verweisen an deem Kader och nach op d'Reform vun der Klimabank, wou de Moien an der zoustänneger Chamberskommissioun de Rapport ugeholl ginn ass. Dës Reform soll garantéieren, dass jiddwereen Accès huet op Finanzéierungsméiglechkeeten, fir säin Haus oder Appartement ze sanéieren.

Här President, de Gesetzesprojet, ëm deen et haut geet, ass also e wichtigen Deel vun engem Gesamtpackage, fir dass jiddwereen d'Méiglechkeet soll kréien, an engem klimafreundlechen an energiespuersame Logement ze wunnen.

Als Demokratesch Partei sti mer hei voll derhannert an dowéinst wäerte mer dësem Projet och eis Zoustëmmung ginn. Dës gesot, géif ech Iech Merci soe fir d'Nolauschteren an der Rapportrice villmools merci fir hire gewinnt exzellente a ganz kompetente Rapport.

Plusieurs voix | Très bien!

M. Fernand Etgen, Président | An ech soen dem Här Max Hahn Merci a ginn d'Wuert weider un déi honorabel Madamm Cécile Hemmen.

Mme Cécile Hemmen (LSAP) | Merci, Här President. Mir hunn et effektiv hei mat engem ganz gudden Gesetz ze dinn an ech soen der Madamm Ahmedova och e grouse Merci fir déi exzellente Presentatioun vun dësem Rapport. E gudd Gesetz eleng geet awer net duer. Wa mir wierklech déi ambitéis Ziler wëllen erreechen a Richtung PNEC, da mussen mer och au fur et à mesure e gudden Monitoring maachen, an zwar e Monitoring, wéi et mam Renovatiounstaux ausgesäit. Wéi ass d'Envergure vun de Renovatiounen? Wéi ass den Taux en général? Wéi vill Leit maachen Renovatiounen an esou weider?

An Ären Äntwerten op verschidde Question-parlementairen, Här Minister, hutt Der gesot, dass den Taux tëscht 0,4 % an 1 % läit. Dat ass zimmlech vag a mir mengen, dass et awer scho wichteg ass, dass een do, wéi gesot, au fur et à mesure méi prezis Donnéeë géif kréien.

Alles an allem, wéi gesot, ass et e ganz gudd Gesetz, wat der LSAP och gefält, an dofir gi mir eis Zoustëmmung. Merci.

M. Fernand Etgen, Président | Merci, Madamm Hemmen. An da wier et un der honorabel Madamm Jessie Thill.

Mme Jessie Thill (déi gréng) | Här President, all Kilowatttheure aus enger fossiler Quell, déi mer aspuewen, ass net nëmme am Interessi vum Klima a vun zukünfte Generatiounen, mee och laangfristeg gudd fir de Portmonni.

E Stot, dee weeder Mazout, Bensinn, Diesel oder Gas brauch, muss sech, wéi de Max Hahn et och scho gesot huet, manner Suergen ëm d'Präisdeierecht maachen an ass och manner de schwankenden Energiepräisser ausgesat. Dat ass einfach d'Realitéit. Dofir freet et mech ëmsou méi, haut kënnen zu dësem extreem wichtige Gesetz ze schwätzen; e Gesetz, dat d'Stéit nach méi ënnerstëtze wäert an hirem ökologeschen Transition zu méi Energieonofhängegkeet.

A mir fänken hei net bei null un. Déi energieetesch Renovéierung vun Bestand ass eng vun den zentralen Achsen, déi mir am Klima- an Energieplang virgesinn hunn. A grad dowéinst hu mir de Subventionsregime fir d'energieetesch Sanéierung fir d'gréng Relance schonn eng Kéier zolidd eropgesat. An d'Leit si prett, fir op de Wee ze goen. Mat de méi héijen Aidë vum Neistart gouf et eng kloer Acceleratioun bei den Demanden. A mir gi mat dësem Gesetzesprojet elo nach méi wäit. Erlaab mir, hei e puer Elementer ervirzepräichen.

Mir maachen den Accès op dës Aiden elo nach méi einfach. Bei Eenzelmesurë muss keng komplett Energieberodung méi gemaach ginn, fir datt de Renovatiounsprojet ka subventionéiert ginn. Dës Flexibilitéit ass e Paradigmewissel a wäert et fir vill Leit méi attraktiv maachen ze sanéieren, well se souwuel déi finanziell wéi och déi administrativ Hürden erofsetzt.

Och ökologesche Materialie bei der Isolatioun gi méi staark promovéiert. Mir setzen am Beräich vun de Materialie méi op Nohaltegkeet a Kreeslafwirtschaft.

Beim Ersatz vu fossilen duerch erneierbar Heizsystemer ginn d'Subside weider konsequent eropgeschraaft a mir féieren och e puer wichteg Neierungen an: méi Geld beim Ersatz vu Mazoutheizungen, Loft-Waasser-Wärmepompe kënnen elo och am Bestand subventionéiert ginn an och den Energiekonsum beim Solarstroum gëtt elo méi staark ënnerstëtzt.

Wéi d'Semiray Ahmedova et scho sot: Mat den Ännerungen maache mir den Émstig op fossillfräi Alternativen nach méi attraktiv. An natierlech ass et richtig, datt et Leit gëtt, fir déi et besonnesch schwierig ass, e Renovatiounsprojet unzegoen, ebe well si net déi néideg finanziell Moyenen hunn – absolut! An ebe si brauchen zousätzlech Ënnerstëtzung an d'Regierung schafft an déi Richtung konsequent weider.

Am Kader vun der PRIME House schafe mir d'legal Basis, déi et soll erméiglechen, datt d'Subventionéierung fir spezifesch Aarbechten direkt un d'Entreprise ausbezuel ginn an d'Bierger/innen déi Suen net méi musse virstrecken.

An da louch jo am Kader vun der Reform vun den Aides individuelles schonn e Projet fir e sozialen Top-up vun der PRIME House um Dësch. An elo mat de Resultater

vun der Tripartite gi mer heiriwwer nach eraus, fir d'Stéit ze entlaaschten. Nach méi Leit wäerte vun dësen zousätzlechen Aidë kënne profitéieren an déi Persounen mat de mannste finanzielle Moyene kréien nach e ganze Montant vun hirem PRIME House zousätzlech uewendrop.

Da vereinfache mir och d'Prozedure beim Klimaprêt a schaffen um Fonds de travaux, bei deem besonnesch déi energieetesch Sanéierung bei Appartementshaiser vereinfacht soll ginn, wat virun allem de Locataire wäert entgéintkommen.

Et gëtt hei also un engem ganze Package geschafft, fir den Zougang zu der energieetescher Renovatioun esou accessibel wéi méiglech maachen, an dat fir jiddereen/t.

Här President, ech kommen zum Schluss. Mir als Chamber hunn hei extreem séier geschafft. Eng Woch nom Avis vom Staatsrot stëmme mir de PRIME-House-Projet, ebe well mir eng Klimakris hunn an d'Onofhängegkeet vun internationale Marchésfluktuationen a Konflikter méi wichteg ass wéi jeemools virdrun. D'Leit brauche grad elo an dës schwierigen Zäiten ons voll Ënnerstëtzung bei hire Renovatiounsprojeten.

Fir mat deem opzehalen, mat deem ech ugefaangen hunn: All agespuert Kilowatttheure aus fossilen Energie bréngt ons onsem Klimazil méi no a spuert gläichzäiteg Geld bei Stroum- an Heizkäschtchen. An domadder ginn ech och den Accord fir déi gréng Fraktioun.

Ech soen Iech Merci.

Plusieurs voix | Très bien!

M. Fernand Etgen, Président | Merci villmools, Madamm Thill. An da wier et um honorabelen Här Fred Keup.

M. Fred Keup (ADR) | Merci, Här President. Ech wëll fir d'éischt der Rapportrice, der Madamm Ahmedova, villmools Merci soe fir hire gudden a komplette Rapport. Ech wëll och soen, dass bei dësem Gesetz hei eng ganz Partie Verbesserung virgesinn, an duerr fir wäerte mer dat och matstëmmen.

Ech wëll awer nach en aneren Denkestouss ginn, an dat ass dat Thema gro Energie. An do ass et esou, dass wann een en Haus nei baut, an zemoos hautzudaags mat all deene verschiddene Materialien, déi een do brauch, do brauch een eng enorm Energie, fir d'Haus ze bauen, wat natierlech derzou féiert, dass den Neibau enorm vill Emissiounen fräisetzt. An duerrfir ass et am Fong – an dat ass den Denkestouss, deen ech wëll ginn – emissiounstechnesch besser, en Albau ze sanéieren, wéi en Haus ofzerappen an en neit dohinner ze bauen. Do brauch ee vill méi Energie. An dat ass, mengen ech, och eppes, wat een eng Kéier muss thematiséieren an engem méi groussen ... Wéi soll ech soen? Jo, méi daitlech.

Merci.

M. Fernand Kartheiser (ADR) | Très bien!

M. Fernand Etgen, Président | Merci villmools, Här Keup. An da wier et un der honorabel Madamm Myriam Cecchetti.

Mme Myriam Cecchetti (déi Lénk) | Här President, energieetesch Renovatioun an d'Installatioun vun erneierbaren Energie mussen vum der öffentlecher Hand finanziert ginn. De Primmesystem, deen haut an enger reformierter Versioun hei zur Ofstëmmung steet, huet dës Zilsatzung, an duerrfir ënnerstëtze mir dat als déi gréng och.

Une voix | déi gréng?

Mme Myriam Cecchetti (déi Lénk) | déi gréng.

(Hilarité générale)

M. Fernand Kartheiser (ADR) | Et ass spéit.

Mme Myriam Cecchetti (déi Lénk) | Jo, et ass spéit. Dir hutt ... et ass och Äert Gesetz, et ass jo Äert Thema. Et war e Lapsus, mee et ass Äert Thema.

Mir ënnerstëtzen als déi Lénk der Regierung hiert Gesetz dann och elo hei. D'Gesetz, dat hei elo virläit, schreift sech an an d'Klimapolitik vun der Regierung. D'Zilsetzung vum dëser Klimapolitik stinn am PNEC an dëse Projet de loi soll dobäi hëllefen, fir d'Ziler bei den Erneierbaren an der Aspuerung vun Energie an domat bei der Reduktioun vum Ausstouss vun Zäregas am Beräich vun de Wunngebaier ze erreechen.

Soumat ass dëse Projet och net isoléiert ze kucken, mee an deem breede klimapolitische Kader. Mir hunn an der Kommissioun de Bilan vun de leschte fënnf Joer PRIME House gewise kritt. Et kann een deen elo positiv oder negativ bewäerten, mee an éischter Linn muss en un der Zilsetzung gemooss ginn, an déi bedeit eng Reduktioun vun den Zäregaser ëm 64 % par rapport zu 1990 (veuillez lire: 2019) am Wunnungsberäich an de kommenden aacht Joer an eng Verduebelung vun den Erneierbare bis dohin. Wa mir eis dat virun Ae féieren an de Bilan vun dem PRIME House donieft leeën, da kann d'Resultat net positiv bewäert ginn, soss maache mir eis lächerlech.

Wann no iwwer fënnf Joer 1.800 Renovatioun subventionéiert goufen a genee esou vill Fotovoltaikanlagen, da muss deen éischte Constat sinn: Et geet hannen a vir net duer! 18 Milliounen a gutt fënnf Joer fir energieetesche Assainissement an 22 Milliounen fir Erneierbare am Wunnberäich, also insgesamt 8 Milliounen d'Joer iwwert deen Zäitraum, sinn dann och ganz bescheide Moyenen.

Mat dësem budgetären Effort geléngt keng energieetesche Transitioun. Fir d'Ziler ze erreechen, beispillsweis bei der Renovatioun, stinn am PNEC 3 % Renovations-taux d'Joer dran. Aktuell leie mir ënnert deem Prozentsaz. Bei der Fotovoltaik an den Erneierbaren allgemeng ass den Ausbau och schleefend. Mir stinn haut bei knapps iwwer 11 % Erneierbaren, also beim Minimalzil fir 2020, aus deem mir eis och deelweis fräikaf hu mat Statistiken.

Et geet also hannen a vir nach laang net duer!

D'Regierung reagéiert hei elo mat engem Eropsetze vu verschiddene Primmen an och enger Flexibiliséierung vun de Primmen. Besonnesch begreisse mir d'Eropsetze vun de Primmen, fir punktuell Aarbechten ze maachen. Dat kënnst sécherlech och Leit mat manner Revenu entgéint. D'Primme staffelung en fonction vun der Nohaltegkeet vum Baumaterial ass och de richtige Wee, fir esou méi verstärkt op nowuessend Ressourcé kënnen ze setzen.

Ech wëll hei och nach eng kleng Klamer maachen, wat d'Manpower ugeet. Vu dass jo e Conseiller énergétique oder en Handwierker, deen am Émweltberäich zertifizéiert ass, gebraucht gëtt, stelle mir eis d'Fro, ob et där iwwerhaupt genuch gëtt.

Allerdéngs vermësse mir weiderhin eng Staffellung vun de Primmen u sech. Eng kleng Staffellung soll iwwert d'Gesetzesreform iwwert d'Wunnengshëllefen agefouert ginn, mee et ass schwierig, dat hei elo kënnen ze bewäerten.

D'Eropsetze vun de Primme gëtt och begrënnt als Kompensatioun fir d'Ewechfale vum Prêt à taux zéro fir energieetesche Sanéierung fir Stéit mat klengem Revenu. Eng Hëllef méi op där enger Säit bedeit also den Ewechfall vun enger sozialer Mesure op där anerer Säit. Dat ass alles anescht wéi ambitiéis an eng kloer Prioritéitsetzung.

De grondleeënde Problem vun dëser Subventionspolitik bleift och hei bestoen: Stéit mat manner Revenu gi keng Investitionsprojeten un, warscheinlech elo nach manner a finanziell onsécheren Zäiten. Mat enger Deelbezuschung vun ekologeschen Investissementer ass et do net gedoen, well se de Rescht vum Montant net kënnen opbréngen an och kee Kredit bei enger Privatbank wëllen a kënnen ophuelen.

Mir fuerderen dofir scho laang méi staark gestaffelt Hëllef an eng Finanzéierung aus éffentleche Gelder, déi och un d'Capacités an d'Besoinen vun all Stot kann ugepasst ginn.

Mir hunn et och mat enger zolitter Deierecht ze dinn. D'Energiepräisser explodéieren an dat misst zu engem Émdenke bei der Subventionspolitik féieren. Et misst ganz geziilt op déi Stéit hi cibléiert ginn, déi an der Energiefale sëtzen, an hei proaktiv op dës Stéit duergaange gi mat Aiden, Berodung, Begleedung a virun allem mat enger éffentlecher Hand, déi finanziell ofséchert. Mir hunn och eng Deierecht op de Baumaterialien. Dat féiert no an no derzou, datt déi opgebessert Primmen opgefress ginn an am Endeffekt e Stot awer muss en zolitte Montant selwer opbréngen.

D'Resultat dovun wäert sinn, datt sech näischt ännere wäert. Energieetesche Renovatiounen an Installatiounen vun Erneierbare bleiwe besser situéiert Stéit virbehalen. D'Explosioun vun de Logementspräisser, déi staark Deierecht op Produkter vum Grondbedarf an d'Léin, déi mat dëser Entwécklung net méi Schratt halen, wäerten d'Krees vu Stéit, déi sech fir eng Renovatioun entscheiden, sécherlech net méi grouss maachen an der Zukunft. D'Entscheidung fir en Assainissement vun engem Logement oder d'Utschaffung vun enger Fotovoltaikanlag berout ganz oft op enger ekologescher Conscience – jo –, mee et ass awer ëmmer och eng ekonomesch Iwwerleeung domat verbonnen. Wann dat net esou wier, da bräichte mer jo och keng Primmen an Aspeisetariffer fir Erneierbare. Ekologie an Economie sinn net ze trennen. Wann d'Regierung mengt, e Stot finanziell lackelen ze kënnen an eng Investitioun, da muss se och erkennen, wat e Stot finanziell ofschrecke ka virun ekologeschen Investitiounen.

(Interruption par la présidence)

An dat sinn d'Privatverschuldung, héich Logementspräisser an iwwerhaupt d'Deierecht, onsécher Aarbechtsverhältnissen an Zukunftsängscht an enger onsécherer Zäit.

D'éffentlech Hand ka vill vun dësen Hindernissen aus dem Wee raumen an domadder e qualitative Sprong packe beim Energiewandel.

(Interruption par la présidence)

D'Leit mat klengem Revenu, déi haut an der Energiefale sëtzen, wieren da vläicht mol eng Kéier ...

M. Fernand Etgen, Président | Madamm Cecchetti, Dir musst esou lues zum Schluss kommen.

Mme Myriam Cecchetti (déi Lénk) | ... de Gewënen, an de Klimaschutz ganz sécher och.

Merci.

(Brouhaha)

M. Fernand Etgen, Président | Ok. Merci, Madamm Cecchetti. An de leschten ageschriwwene Riedner ass den honorablen Här Marc Goergen.

M. Marc Goergen (Piraten) | Merci, Här President. Merci dem Semiray Ahmedova fir dee gudden schrëftlechen a mündlechen Rapport. Et ass elo no 20.00 Auer. Ech erspueren Iech elo e Best of vun eise Klimapositionen. Natierlech begreisse mer, wann de Minister an d'Chamber kënnt an e gëtt nei Primme fir alles, wat

ëmweltfrëndlech ass. Ech mengen, do sidd Der ëmmer wëllkomm. Dofir wäerte mir et haut och matstëmmen.

Merci.

M. Fernand Etgen, Président | Merci, Här Goergen.

D'Regierung huet d'Wuert, den Här Energieminister Claude Turmes.

Prise de position du Gouvernement

M. Claude Turmes, Ministre de l'Énergie | Villmools merci. Ech mengen, et ass schonn e laangen Dag gewiescht.

Plusieurs voix | Nee!

M. Claude Turmes, Ministre de l'Énergie | Nee!

Une voix | Da maacht et kuerz!

(Brouhaha)

M. Gilles Baum (DP) | Dir wësst net, wéi resilient dass d'Chamber ass.

M. Claude Turmes, Ministre de l'Énergie | Da schwätzen ech och e bësse méi laang, wann Der dat gären hätt.

M. Fernand Etgen, Président | Här Turmes, kommt zum Gesetz.

(Hilarité générale)

Une voix | Très bien!

M. Claude Turmes, Ministre de l'Énergie | Méi schnell eraus aus fossilen Energien, ech mengen, dat ass wierklech dat, wat mer elo brauche wëinst dem Klimaschutz, fir awer och keng Kricher vum Här Putin indirekt ze finanzéieren, an dann awer och, fir erauszekommen aus engem System, deen extreem volatil Präisser huet, ëmmer méi volatil Präisser huet. Ech weess och net, ob dat an Zukunft an där Hisiicht besser geet. An déi stabilsten Energie vun der Zukunft si ganz kloer d'erneierbar Energien an dat heescht, déi beschten Energie, ech mengen d'Madamm Thill huet dat gesot, ass déi, déi ech guer net brauch.

Et ass eigentlech wierklech e flotten Zoufall, dass haut um Dag, wou mer den Accord vun der Tripartite ..., dee jo och nieft de finanzielle Kompensatiounen, déi mer kuerzfristeg maachen, och e Schwiéerpunkt huet op der Energietransitioun, dass mer haut och grad op deem selwechten Dag elo d'PRIME-House-Gesetz hei kënnen stëmmen.

Ech mengen, et ass e Gesetz, wat haaptsächlech beim Carole Dieschbourg ass – d'Carole ass haut zu Paräis, dofir iwwerhuelen ech säi Rôle hei –, an dat mer zesumme gemaach hu mat mengem Ministère a mam Ministère vum Henri Kox.

Ech mengen, ech ginn elo net an d'Detailer. Dir hutt matkritt: Mir wäerte weiderhin am Neibau verschidden Technologie féieren, notamment d'Wärmepumpen. De Schwiéerpunkt wäert dorop leien, fir an der Renovéierung vun de Gebaier nach besser weiderzuekommen, virun allem och iwwer vereinfacht Prozeduren. A mir wäerten och den Handwerker méi e grouse Rôle ginn an der Berodung, fir eeben d'Laascht e Stéck wäit ewechzehuele vun den Energieberoder an do handendrun awer och e System ze maachen, dee méi einfach ass.

(Brouhaha)

Wat wichteg ze verstoen ass ... an ech mengen, et sinn der e puer, déi hei soen, mir sinn net schnell genuch. Ech si mat deenen d'accord an duerfir brauche mer dat heite Gesetz, wat jo elo vereinfacht a méi Primme gëtt. Mee dat heite Gesetz ass en Deel vun engem Puzzle, wou mer jo och aner Saache maachen. A mir brauchen

eng Reform vum Syndicsgesetz. Mir brauchen och, mengen ech, wierklech obligatoresch Fongen. Gutt, a mir kënnen eng Kéier driwwer nodenken, ob mer do mussen eppes ofpufferen oder offiedere fir déi Leit, déi manner Revenuen hunn.

Mee mir hu jo nach en anert Instrument, wat hei eent zu eent mat zesummespillt. Dat ass den Amortissement accéléré fir all Propriétaires vun Appartementer oder Haiser, déi se verlounen. Dat heescht, Dir kritt och den Amortissement accéléré nëmmen, wann Der och iwwert d'PRIME House aner Primmen ugefrot hutt. Dat heescht, déi zwee Systemer sinn aneneegestréckt.

An nieft der Renovatioun geet et natierlech dann drëm, dass mer Mazout- a Gasheizungen ersetzen. An ech wëll och, dass mer dat net elo iergendwann déi nächst Jore maachen, mee dass mer e kollektiven Effort maache vun haut un, fir esou vill Gas- a Mazoutsheizungen ze ersetze bis den nächste Wanter an entweder ganz erauszuhuelen oder eppes ze maachen, wat eventuell och Sënn mécht, virun allem an Haiser, déi net esou gutt renovéiert sinn. Dat ass d'Méiglechkeet, fir nieft menger Gasheizung oder nieft menger Gasheizung eng Wärmepumpe hinzustellen, déi wäert 70-80 % vun der Energie vum Joer liwweren, an dann notzen ech nach meng besteeënd Mazout- oder Gasheizung just an deene Stonnen, wou et richteg kal ass. An dat ass eppes Neies, wat mer elo probéieren, mat den Handwierker, och mat geziilt Campagné méi massiv elo ganz schnell ënnert d'Leit ze bréngen.

An dann nach ee Wuert, Madamm Cecchetti, zu dem Top-up. Dir sot elo, mir géifen net genuch maachen. Dir sot, do wier nach eng Differenz. Mir hunn haut am Kader vun der Tripartite decidéiert, dass mir 100 % vun enger Wärmepumpe un déi Leit ginn, déi am Q1 sinn. A bei 100 %, do ass näischt méi Rescht. Dat heescht, mir ginn elo op e System, deen et schonn an Eisträich gëtt. An ech si frou, dass mer deen elo iwwert d'Tripartite och mat Hëllef vun de Gewerkschafte kréien, fir ze soen: Déi Leit, déi net vill Revenuen hunn, deene Leit gi mer 100 % vun enger Wärmepumpe oder 100 % vun hire Renovatiounen a mir stellen och bei der Klimaagence elo Leit an, -spezifesch fir allegueren déi, déi d'Allocation de vie chère kréien. Déi kréien eng spezifesch Berodung, well mer wëssen, dass dat Leit sinn, déi et deelweis méi schwéier hu finanziell, awer deelweis ass dat jo och organisatoresch net ëmmer esou einfach.

Dat heescht, den Top-up ass genee dat, wat eis gefeelt huet. A mir hunn eigentlech elo d'Tripartite genotzt, fir elo endlech déi Baustell zouzemaachen, dat heescht, vu ganz geschwënn un, well mir wäerten den Top-up och an d'Omniibusgesetz dramaachen. Dat heescht, mir kréien dat och éischter. Et ass hei zu Lëtzebuerg fir déi Leit, déi keng oder manner Revenuen hunn, och elo méiglech, massiv an erneierbar Energien an och an Energieeffizienz ze investéieren.

Den Här Galles hat nach gefrot: Hu mer genuch Beroder? Mir hunn der ni genuch! Mee dat, wat ech jo schonn hei virgeschloen hunn, ass, dass op d'mannst d'Kommissioun, déi zoustänneg ass, elo relativ schnell eng Kéier bei d'Klimaagence invitéiert gëtt, fir datt mer Iech erklären, wat mer an der Lescht alles gemaach hunn, fir dee System ze optimiséieren a virun allem och, wéi mer dat mat den Handwierker zesummen digitaliséieren, fir dass mer do en aneren Drive an dat Ganzt kréien.

D'Madamm Hemmen hat nach gefrot iwwert den Taux de rénovation. Gutt, eis Statistike mussen nach besser ginn. Ech hunn, wéi ech elo an de Ministère komm sinn, misse feststellen, dass eis all déi Donnéeën, déi mer hunn iwwert de Passeport énergétique ... dee gëtt et zwar theoretesch, mee praktesch ass de

Computerprogramm, deen do hannendrun ass, eng Kéier gecrasht an dee si mer elo amgaangen, erëm opzebauen. A mäin Zil ass, dass all Gebai – an net all Propriétaire, mee all Gebai – e Passeport, e Pass énergétique kritt. An do wäerte mer dann och den Nodeel vun där Moosnam ..., dass wann ech eenzel Dealer maachen, kéint et jo sinn, dass kee méi weess, ob an deem Haus eng Fënster ersat oder en Daach gemaach ginn ass ... Mir wäerten e Passeport énergétique fir all eenzelt Haus maachen an dat verschneide mat den Energiepass, déi jo obligatoresch sinn, ëmmer wann ech veränneren. Dat heescht, mir wäerten e System opbauen, wou mer wierklech all Donnéeën hunn, an da kënnen mer och besser rechnen, wou mer dru si mam Taux de rénovation.

Fir et kloerzemaachen: Mir leeë mat deem heite Gesetz, mat der Kombinatioun vum Top-up, elo den Turbo an. An ech si ganz optimistes, dass déi Vereinfachung, déi mer hei hunn, dass déi Motivatioun vun den Handwierker an eeben och dat ganzt Ëmfeld elo vun dëser Kris derzou féiere wäerten, dass mer méi wäerte renovéieren, méi Wärmepumpe wäerten hunn, manner Mazout- a manner Gasheizung wäerten hunn.

Ech soen Iech Merci.

Plusieurs voix | Très bien!

M. Fernand Etgen, Président | Merci dem Här Energieminister Claude Turmes. D'Diskussioun ass elo ofgeschloss.

Mir kommen elo zur Ofstëmmung iwwert de Projet de loi 7884. Den Text steet am Document parlementaire 7884⁸.

Vote sur l'ensemble du projet de loi 7884 et dispense du second vote constitutionnel

D'Ofstëmme fänkt un. Mir kommen elo zu de Votes par procuration. De Vott ass ofgeschloss.

De Projet de loi ass mat 60 Jo-Stëmmen eestëmmeg ugeholl.

Ont voté oui : Mmes Diane Adehm, Nancy Arendt épouse Kemp, M. Emile Eicher (par Mme Nancy Arendt épouse Kemp), MM. Félix Eischen, Paul Galles, Léon Gloden (par M. Laurent Mosar), M. Jean-Marie Halsdorf (par M. Félix Eischen), Mme Martine Hansen, M. Max Hengel (par Mme Diane Adehm), MM. Aly Kaes, Marc Lies, Georges Mischo, Mme Octavie Modert (par M. Marc Lies), M. Laurent Mosar, Mme Viviane Reding (par M. Claude Wiseler), MM. Gilles Roth, Jean-Paul Schaaf (par M. Paul Galles), Marc Spautz (par M. Georges Mischo), Serge Wilmes, Claude Wiseler et Michel Wolter (par Mme Martine Hansen) ;

MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusti Graas, Max Hahn, Mme Carole Hartmann, MM. Pim Knaff, Claude Lamberty et Mme Lydia Polfer (par M. Gusti Graas) ;

Mme Simone Asselborn-Bintz (par Mme Cécile Hemmen), M. Dan Biancalana (par M. Mars Di Bartolomeo), Mmes Tess Burton, Francine Cloesener, MM. Yves Cruchten, Mars Di Bartolomeo, Mme Cécile Hemmen, M. Dan Kersch (par M. Carlo Weber), Mme Lydia Mutsch (par M. Yves Cruchten) et M. Carlo Weber ;

Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary (par Mme Josée Lorsché), M. Marc Hansen, Mme Josée Lorsché, M. Charles Margue et Mme Jessie Thill ;

MM. Jeff Engelen, Fernand Kartheiser, Fred Keup et Roy Reding (par M. Fernand Kartheiser) ;

MM. Sven Clement et Marc Goergen ;

Mmes Myriam Cecchetti et Nathalie Oberweis.

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

12. 7905 – Projet de loi relative à l'octroi de la garantie de l'État aux lignes de crédit contractées par le Fonds de garantie des dépôts Luxembourg, et portant modification de la loi modifiée du 18 décembre 2015 relative à la défaillance des établissements de crédit et de certaines entreprises d'investissement

Mir kommen elo zum Projet de loi 7905 iwwert d'Garantie de l'État fir Kredittlinne vum Fonds de garantie des dépôts Luxembourg. D'Riedezäit ass nom Basismodell festgeluecht. An d'Wuert huet elo de Rapporteur vun dësem Projet de loi, den honorabelen Här André Bauler. Här Bauler, Dir hutt d'Wuert.

Rapport de la Commission des Finances et du Budget

M. André Bauler (DP), rapporteur | Merci, Här Président. Léif alleguer. An domat wiere mer zur Ofwieselung nees an der Finanz- a Bankewelt ukomm.

Wann Der geleeëntlech d'Télee kuckt, da kënn et emol vir, datt Der ganz laang Schlaange vu Mënsche gesitt, déi viru Banke stinn a waarden, fir un hir Suen ze kommen. Si waarden, fir un hir Suen ze kommen, well se der Institutioun oder dem Finanzinstitut, deem se se geléint hunn, net méi vertrauen a folglech d'Suen nach séier wëllen am Grapp hunn. Dat si Biller, déi een ëmmer erëm an den Neiegeete gesäit, wann iergendwou eng Finanzkris ausgebrach ass oder eng Devisen amgaangen ass, rasant ze entwäerten.

Et ass de Fall, wann eng Kris d'Vertrauen an d'Institutiounen an an d'Bankewiesen zerstiéiert. Vu datt Dir alleguer heibannen iwwer eng ganz breet Culture générale verfüügt, erënnert Der Iech bestëmmt un dat historesch Beispill vum 17. Juli 1720, wéi dem Schott John Law seng Bank a Frankräich, déi sech verspekuléiert hat a sech duerch eng „Publicité tapageuse“, wéi d'Fransousen dat nennen, ausgezechent hat, Dau-sende vu Leit an de Ruin gestierzt huet.

An der rue Vivienne zu Paräis hu sech deemools ronn 15.000 Leit gedréckt – Eenzelner goufe souguer erdréckt –, fir un hir Suen ze kommen, well se kee Vertraue méi an dës Bank haten. Et war ee vun de grouse Finanzskandalen am fréien 18. Joerhonnert wärend der Zäit vun der Régence. Dës Beispill weist, datt d'Bankewiese grad eeben um Vertraue baséiert.

Léif alleguer, komme mer nees an eis Zäit an an eist Land zrëck. Et ass eng absolutt Prioritéit, fir hei zu Lëtzebuerg d'Deposanten ze schützen, also d'Leit, déi hir Erspuernesser op Konte setzen. Mir schwätzen hei vun dacks e Liewe laang haart erschafften Erspuernesser vu Privatpersounen. Duerfir hu mir hei zu Lëtzebuerg eng ganz Panoplie u Mechanismen an un Normen, déi derfir suergen, datt d'Erspuernesser vun de Leit souwäit wéi méiglech sécher sinn.

E wichtege Moyer ass de Fonds de garantie des dépôts Luxembourg. Et ass e Fong, deen als zousätzlech Garantie funktionéiert, wann d'Bank et selwer net méi géif packen, fir hir Clienten auszebezuolen. An deem Kader kréie mer jo allegueren eemol am Joer, Dir wësst dat, vun eiser Bank e Brëif heemgeschéckt, deen erkläert datt eis Avoire bis zur Zomm vun 100.000 Euro iwwert dës Fong gedeckt sinn. Wann Der also méi Konten hutt, da kënn Der déi Zomm och problemlos an d'Luucht schrauwen, wann Der d'Méiglechkeet hutt.